

國朝先正事略

國朝先正事略卷之二十 名臣

平江李元度次青纂

王蘭泉侍郎事略

公姓王氏諱昶字德甫號述庵學者稱蘭泉先生江蘇青浦人父士毅年四十五無子禱於靈隱寺夢人贈以蘭遂生公少穎異博學善屬文家貧作固窮賦以見志乾隆十八年進士歸選班二十二年

高宗南巡召試第一賜內閣中書協辦侍讀入直軍機處史文靖蔣文肅梁文莊皆待以國士洊升刑部主事員外郎郎中三十三年以言兩淮鹽運提引事不密罷職時緬甸未靖文中

成公阿桂以定邊右副將軍總督雲貴奏請以公佐軍事遂至騰越出銅壁關擊賊江中勝之緬酋乞命阿公屬公草檄允其降班師旋永昌旣而緬甸貢表久未至復從阿公如騰越三十六年四川小金川土司澤旺之子僧格桑不靖金川應襲土司索諾木應之詔尙書溫福代阿公移師四川勦辦奉旨授吏部主事從溫公西路軍進討溫公屬公作檄斥僧格桑罪遂克斑斕山進攻日耳寨阿公奉詔由北路進兵兼督南路公復從阿公軍攻克美美卡以皮船渡水克小金川僧格桑遁澤旺降檻送京師進討大金川阿公奏公無兄弟母年七十餘明大義勛以殫心軍事今從軍五年矣得旨遷員外郎三十八

年至當噶山。山脊絕險。官兵營壘與賊錯處。雨雪甚夏。溫公兵潰木果木。阿公亦退兵至翁古爾壟。時警報絡繹。詔旨疊至。公力疾叱馭懸厓。日行數百里。夜治章奏。軍書於礮火矢石中。無誤無畏。冬。大兵復進。據美美卡。攻大板昭。小金川平。擢郎中。復從討大金川。克勒烏圍。刮耳崖。四十一年。三路兵合攻。益急。索諾木等率眾投罪。僧格桑先病死。以其首獻。公草露布告捷。於是兩金川悉平。公在軍中前後九年。凡加軍功十三級。紀錄八次。凱旋至良鄉。駕幸黃新莊郊勞。用戎服行禮。賜茶。賜宴紫光閣。賞賚優渥。奉旨王昶久在軍中。懋著勞績。可授鴻臚寺卿。賞戴花翎。在軍機處行走。時漢人由科甲起家。

賜花翎者惟大學士于公敏中及公而已。尋擢通政司副使。四十二年擢大理卿。四十四年乞假歸營葬。冬授左副都御史。四十五年扈駕南巡恭和御詩七次回鑾次嘉興授江西按察使。抵任檄府縣力行保甲禁族祠訟鬪之習。坐堂皇六十餘日決獄百餘案。丁母憂哀毀盡禮服闋補直隸按察使。調陝西奏命盜逃犯宜於定案時速行通緝從之。逆回田五倡亂奉命備兵長武時賊勢張兵少公試礮巡城籍丁壯繕守具民以無恐京外大兵皆過長武用車馬以萬計公飛書草檄立辦之。泊班師迄無一誤。河南亂民秦國棟等戕官奉命緝捕獲之。五十一年遷雲南布政使雲南銅政繁公盡發故籍著銅政全

書五十卷。示補救調劑之術。五十三年。調江西布政使。明年擢  
刑部右侍郎。五十八年。以病乞休。

上鑑其老。允之。諭以歲暮寒。俟春融歸。明年歸。名所居曰春  
融堂。嘉慶元年。以

禪受大典。至京。與千叟宴。四年。

純皇帝升遐。復至京謁梓宮。蒙召見。勅建言。公密封。以  
進。不畱。草夏歸青浦。以分償。滇銅。鬻田宅入官。居廟廡。朋舊贈  
遺。以刻所著書。五年。重遊泮宮。十一年六月六日。病亟。口授謝  
恩表。自定喪禮。初七日。雞鳴。公曰。時至矣。遂薨。年八十有三。公  
之扈駕。巡山東江浙也。古帝王聖賢名臣陵墓祠廟。嘗分遣

致祭。乾隆己卯庚辰壬午分校順天鄉試。辛巳癸未分校會試。王子主順天鄉試。皆以經術取士。士之出門下爲小門生。及從游受業者二千餘人。在京師與朱笥河互主騷壇。有南王北朱之目。又嘗主婁東敷文兩書院。欽定通鑑輯覽同文志一統志續三通等書皆奉勅與纂修焉。又奉勅刪定三藏經咒。編譯佛典。深於禪理者不及也。前後奉使勘鞫高郵州假印重徵江陵縣偷減堤工等七案。研求虛實。無枉縱。公之學無所不通。早歲沈文。懋選其詩與王鳳喈鳴盛。吳企晉泰來。錢竹汀大昕。趙升之文哲。曹來殷仁虎。黃芳亭文蓮。爲吳中七子名傳海外。晚宗杜韓蘇陸。侍讌賡歌皆稱旨。詞擬姜夔張炎。古文力

宗昌黎眉山碑版之交。照四裔。積金石文字數千通。書五萬卷。所至朋舊文譙提唱。風雅後進。執經請業。舟車錯互。戶外屨恒滿。士藉品藻以成名。致通顯者不可勝數。公治經與惠氏棟同深。漢儒之學。詩禮宗毛鄭。易學荀虞。言性道尊朱子。旁及河津餘姚諸家。不區門戶。始入京師。會秦文恭纂五禮通考。卽以吉禮屬公。生平重倫紀。尙名節。在軍中和平。簡易白科。爾沁王以下皆親重之。爲司寇時。與阿文成爲舊識。他非所契。嘗訓子曰。易言比匪之傷。非匪人之能傷。比者自重其傷也。少與王鳳喈錢竹汀同學同年。至是同歸老相。與講求問學。跌宕湖山。尤快事焉。自來文學與武功文章與政事判然兩途。至於漢宋互異。



朱陸殊科。治樸學者。以詞賦爲虛華。論性天者。譏訓。故爲繁碎。分茅設蔕。莫能相通。而得其一。皆足以名世。惟公邃於經。健於文。富於詩。詞精於考證。達於政事。韜略研窮於性理。又北至興桓。西南出滇。蜀外所過。名山大川。皆足開拓心胷。增長識力。淳法。施演。不名一家。可謂通儒也。已所著春融堂詩文詞集六十八卷。金石萃編百六十卷。青浦詩傳三十二卷。詞二卷。湖海詩傳四十六卷。湖海文傳七十五卷。國朝詞綜四十八卷。明詞綜十二卷。征緬紀聞三卷。蜀徼紀聞四卷。滇行日錄三卷。屬車雜志二卷。滇詔紀程。適秦日錄。商洛行程記。豫章行程記。雪鴻再錄。使楚叢談。臺懷隨筆。各一卷。青浦縣志。太倉州志。蒲褐山

房詩話如干卷皆行世。餘若天下書院志。朝聞錄等書未刻者。尚十餘種。

紀文達公事略

乾隆三十有八年。

純皇帝特開四庫全書館。以河閒紀公爲總纂官。公貫徹儒籍。旁通百家。凡六經傳注得失。諸史異同。子集支分。派別以及詞曲醫卜之類。罔不抉奧提綱。溯源竟委。每進一書。仿劉向曾鞏例作提要冠諸簡首。

上輒覽而善之。又奉詔撰簡明目錄。存書存目多至萬餘種。皆公一手所訂評。騰精審識。力在王仲寶阮孝緒之上。藏諸七閣。褒然巨觀。眞本朝大手筆也。公諱昀。字曉嵐。一字春帆。晚號石雲。世爲河閒獻縣著姓。祖天申有善行。歲饑出粟數萬石。

活人無算。父容舒官姚安知府。先是郡爲九河入海故道。天雨則汪洋成巨浸。中夜輒有火光。公大父夢火光入樓中而公生。光遂隱。人以爲公實神物化身也。少奇穎。讀書目數行。下夜坐暗室。目閃閃如電光。不燭能見物。比知識漸開。光亦斂矣。乾隆丁卯年二十四。領順天鄉試解額。初闈中擬朱文正首卷。以公二場表儷語冠時。乃定公第一。而文正亞之。時阿文勤劉文正典試事。榜發。皆以得人賀。二公復命。遂以二人姓名。

上聞。公與文正皆早受特達之知。職此故也。明年文正中第。公遲至甲戌成進士。選庶吉士。授編修。己卯典試山西。庚辰分校禮部試。辛巳京察記名。以道府用。壬午分校順天鄉試。提督。

福建學政癸未遷侍讀。父憂歸。服闋補侍講。充日講起居注官。晉右庶子。戊子。授貴州都勻知府。旋以四品服畱任。擢侍讀學士。坐泄漏運使盧見曾事。謫戍烏魯木齊。辛卯。召還。授編修。癸巳。擢侍讀。總纂四庫全書。與內廷翰林一體宴賚。同事者爲陸副憲錫熊。陸侍郎費墀。而公實綜其成。繕書局凡十有三年。體例皆其所定。丙申。擢侍讀學士。直文淵閣。知起居注。己亥。擢詹事。晉內閣學士。壬寅。授兵部侍郎。仍兼直閣事。改任不開缺。異數也。甲辰。充會試副考官。乙巳。晉左都御史。丙午。除禮部尙書。充經筵講官。戊申。賜紫禁城騎馬。典武會試。自後爲總憲者五。長禮部者三。壬子。以畿輔水災。奏請截畱南漕數萬石。設

粥廠十賑饑民得旨六月開賑後增五廠自季夏至明年四月全活無算嘉慶元年丙辰典會試調兵部尚書己未典武會試癸亥六月壽八十

上遣官賁上方珍物賜之命敎習庶吉士是年奏婦女猝遭強暴捆縛受污不屈見戕者例不旌表臣謂捍刃捐生其志與抗節被殺者無異如忠臣烈士誓不從賊雖縛使跽拜可謂之屈膝賊廷哉請勅下所司議與未被污者略示區別予旌表下部議行乙丑正月復調禮部拜協辦大學士加太子少保管國子監事二月十四日薨於位年八十有二有詔紀昀學問淹通由翰林洊歷正卿擢襄綸閣服官五十餘載辦理四

庫全書始終其事十有餘年。最爲出力。可賞陀羅經被。派散秩大臣。帶侍衛十人。前往賜奠。並賞白金五百兩治喪。尋賜祭葬。予諡文達。公於書無所不通。尤深漢易。力闢圖書之謬。一生精力。備注於四庫提要及目錄。不復自爲撰著。今人所見狹。偶有一得。輒自矜。獲而不知。皆古人所已言。或爲其所已闕。公胸有千秋。故不輕著書。其所欲言。悉於四庫書發之。而惟以覺世之心。自託於小說稗官之列。其感人爲易。入自文集外所著閱微草堂筆記。凡七種。中多見道之言。性坦率。好滑稽。有陳亞之稱。然驟聞其語。近詼諧。過而思之。乃名言也在。上前嘗以片語解紛。實錄館請甄敘。或言其過優。

仁宗以問公公不置可否但云臣服官數十年無敢以苞苴進者惟戚友倩臣爲其先人題主或銘墓雖厚幣輒受之

上輟然曰然則朕爲

先帝推恩何不可之有某科考試差後有宣布前列詩句姓名者臺臣密以告

上召公問之公頓首曰如臣卽洩漏者問何故曰書生習氣見佳作必吟哦或記誦其句出而欲訪爲何人手筆則不免於洩漏矣

上含笑事遂寢少與朱文正公不相下有文人相矜意後見文正所爲文大歎服以爲向不知公吾過矣自後交誼乃益摯云



畢秋帆尙書事略

嘉慶二年秋七月兵部尙書湖廣總督世襲輕車都尉鎮洋畢公薨於辰陽行館公久在行間著勲績及移駐楚南籌善後之策苗境救甯

上聞公積勞邁疾手足不仁卽馳賜上藥諭以安心調攝公自念受恩深重且當三楚多事不敢以私廢公力疾視事有加無疹遂致不起遺疏入九重軫悼贈太子太保諭祭文有性行純良才能稱職鞠躬盡瘁恤死報功之哀可謂生榮死哀也已公諱沅字纓衡一字秋帆自號靈巖山人由休甯遷太倉州後析置鎮洋遂占籍焉少穎悟六歲母張太夫人手示

毛詩離騷過目卽成誦太夫人工詩著有培遠堂集公承母訓稍長讀書靈巖山從沈文懿德潛惠徵君棟游學業益遂乾隆十八年中順天鄉試旋授內閣中書入直軍機處大學士傳文忠尙書汪文端裘文達咸以公輔期之二十五年進士廷對纔纔數千言議論剴切進呈擬第四

上親擢第一是歲始定新進士前十入於讀卷日引見公儀觀秀偉進止有度

天顏甚喜臚唱授修撰館中經進文字出公手皆典重有體遷右中允再遷侍讀充日講起居注官教習庶吉士轉左庶子充會試同考官三十二年

上親耕藉田。御觀稼臺宣示。御製詩給筆札令賡和詩成。  
進覽稱善。是冬授甘肅鞏秦階道。召見。諭曰。汝軍機舊屬。  
達於政治。不徒文學優長也。到官卽留辦新疆經費局。又從總  
督出嘉峪關。察勘屯田。自木壘河至吉木薩。往還數萬里。途中  
多紀行詠古之篇。尋調安肅道。三十六年。擢陝西按察使。入覲。  
具言甘肅頻年苦旱。米有旨諭督臣加意賑卹。并免積欠四  
百萬。尋擢陝西布政使。護理巡撫。時大兵征金川。由陝入蜀。公  
督理臺站三十八年。河渭洛三水溢入朝邑界。公馳往。分別賑  
卹。全活甚眾。擢陝西巡撫。歲旱。禱太白山。得甘雨。清理八旗及  
提標馬廠空地六百五十餘頃。募民開墾納賦。爲賞卹之用。又

奏修西嶽廟及元聖周公墓訪其後裔置五經博士以奉祀事  
濬涇陽龍洞渠灌漑民田又以秦中碑版最多萃而置之府學  
俾無散佚在陝六載兼署西安將軍者再署陝甘總督者一  
特賜戴孔雀翎恩遇之隆漢大臣莫及焉丁母艱甫及一年  
上以陝西任重復起公署巡撫事會甘肅回賊陷河州逼蘭州  
城公檄調滿漢兵先後赴援又請調簡入旗勁旅令大臣總統  
援應事平

上諭閣臣曰畢沅在陝西聞甘省逆賊滋事卽能悉心調度事  
事妥協並有先辦而與朕旨相合者朕甚嘉焉可賞給一品頂  
戴其後平涼逆回倡亂攻掠通渭靜甯驛道梗塞公復調兵助

勦又分兵出閒道繞其後俾不得他竄公之盡心國事不分畛域多此類也五十年調河南巡撫是時河南北頻年旱而河水泛溢壞田廬公旣受命卽奏請截漕二十萬石平市價以濟民食被災各州縣展賑兩月其徵收未完銀米視被災分數或全免或緩徵俱荷允行手敕報曰如此盡心民莫必徼天佑朕爲彼一方民慶幸也遂增給三十萬石以賑之尋奉命詣桐柏山求淮源公親履巔巔繪圖以進蒙嘉獎御製淮源記述其事未幾賞穿黃馬褂擢湖廣總督未行以伊陽拒捕案被議仍畱巡撫任五十二年河決睢州溢甯陵商邱永城鹿邑柘城諸縣詔大學士阿文成公臨視會同籌畫自夏迄冬

凡五閘月藏事。撫卹災黎。蠲緩備種。全活無算。明年河北三郡旱。遣旨撥運米麥十萬石減價平糴。又令常平社倉不拘常例。糴借兼行。又濬治百泉丹河九道堰。引水溉田。俾飢民得受僱值。尋授湖廣總督。時江水暴漲。溢入荊州城。下游州縣多淹沒。公以江心窖金洲阻塞水道爲上游之害。亟命拔去蘆葦。居民毋得占據。仍於北岸築壩。逼溜南趨。以資保護。修葺城垣堤岸。及官署民房。以工代賑。又革除鹽課陋規。禁絕私販。每歲溢銷十數萬引。五十九年入覲。天津行在賜御製詩。隨於幄次。廣和自陳早衰多病。乞京職自效。溫諭不允。是秋坐失察湖北姦民傳教。左遷山東巡撫。臨清館陶諸州縣被水。遣旨加

兩倍賑卹。豁免秋糧。及本年漕米遺官分赴豐收處購運糧食。備來歲平糶。六十年。恩詔普免各省民欠。公查出東省節年所欠正耗銀四百八十七萬兩有奇。常平社倉米穀五十萬石有奇。咸奏除之時。已得再任湖督之命。拜疏而後行。惟恐弗及也。初入楚境。聞苗疆有警。卽馳赴常德。籌畫轉餉。旣而大學士福公四川總督和公先後蒞楚。檄調六省兵會剿。供支日不下數萬。公移駐辰州。督運軍儲。輸將相繼。大兵旣擒首逆吳半生等。乾州永順永綏保靖諸苗五百餘寨先後詣辰乞降。公承詔撫諭。咸感泣叩頭去。嘉慶元年春。湖北枝江賊起。詭稱白蓮教。而宜都長陽長樂教匪一時應和。四出焚掠。公馳赴枝

江興巡撫惠公調兵進剿連破蕭家巖栗子山長嶺衝諸寨時  
北省標營兵皆調赴苗疆姦民乘虛煽誘分擾諸縣當陽保康  
來鳳竹山相繼陷詔諸大帥分路攻剿而公與將軍舒公攻  
當陽卽選驍勇扼山隘殲其外援三千人賊悉力死守公親督  
將士以火攻克其東門賊退守西北復攻拔之殲賊二千餘擒  
偽帥楊啟元等縣境悉平事聞優詔褒美賞輕車都尉世職  
復馳至襄陽督同鎮道邀擊賊於青河口破之時貝子福公總  
督和公相繼徂謝公密奏乾州已復首逆就擒惟石柳鄧未獲  
而以十萬之眾駐守蠻烟瘴霧中苗人見有重兵生計無資石  
逆轉得從中煽亂不若囚其窮困許以自新酌撤苗寨官兵而



於四面設兵防守。其有出外滋事及同類讐殺者。用以苗攻苗之法。可不再煩兵力。詔下其章於軍中。議之未幾。大兵破平隴。斬石柳鄧等。遂詔公馳往苗疆。籌議善後。及撤兵。事二年春。抵乾州。周歷三廳。撫諭苗寨。清釐民苗地畝。給還耕種。咸伏地感泣。各歸生業。各省兵次第撤回。公遵旨畱駐辰州。奏請移提督駐辰州。而以辰州協駐乾州。洞庭協駐常德。又於花園汛添設總兵。以永綏協保靖營隸之。諸要隘皆撥兵屯守。聯絡控制。其苗寨酌設土弁。以資約束。又估修城堡。營房。賑難民。卹殉難官弁及紳士婦女。皆得旨勅部議行。而公遽以炎瘴致疾。薨於軍。年六十有八。朝野惜之。公議量宏遠。喜愾不形於色。

通僚屬以禮議事不執己見人人皆得盡其言若大疑難事眾  
莫識所措者公沈機獨斷雖萬口不能奪出仕西陲時拓地二  
萬餘里名臣宿將往來邊徼皆與之上下諏咨洞悉利弊敷歷  
數鎮職事修舉不以察察爲明煦煦要譽所薦拔多至大僚每  
入覲命在南書房和詩備顧問所造古器物御製詩文紀  
之

太上皇帝禪受禮成恭進典詮一篇淵雅得體賞賚優渥前  
後所賜御筆及上方珍物不可勝紀性篤孝遇二親諱日哀  
慕涕零嘗以幼孤承母教始得成立奏達御前

上賜經訓克家四大字隨於靈巖南麓築樓以奉御書待兩

弟友愛視諸姪如己子。兩妹早寡。爲置產贍其孤甥。生平篤於故舊。尤好汲引後進。如吳中書泰來。嚴侍讀長明。程編修晉芳。邵學士晉涵。洪編修亮吉。孫觀察星衍等。皆招致幕府。公暇。詩酒唱酬。無虛日。性好著書。鉛槧不去手。謂經義當宗漢儒。故有傳經表之作。謂文字當宗許氏。故有經典辨正。及音同義異辨之作。謂編年之史。莫善於涑水。續之者有薛王徐三家。徐雖優於薛王。而所見書籍猶未備。且不無詳南略北之病。乃博稽羣書。考證正史。手自裁定。始宋訖元。爲續資治通鑑二百二十卷。別爲考異。附於本條下。凡四易橐而成。謂史學當究流別。故有史籍考之作。謂史學必通地理。故於山海經晉書地理志皆有

校注。又有關中勝蹟圖記。西安省志之作。謂金石可證經史。宦跡所至。搜羅極博。有關中中州山左金石諸記。詩文下筆。卽成。不拘一格。要皆自運性靈。不違大雅之旨。有靈巖山人詩集四十卷。文集八卷。公一生得力在善讓。而肯爲人任事。嘗直軍機。期滿當出。友人諸君重光屬公代公未及答。而諸竟去。公夜坐。無事適陝督黃文襄廷桂疏至。言新置屯田事。遂熟復之。後數日。廷對策問屯田事。條對獨精核。進呈擬第四卷。

上改第一。而諸君居其次。其侍親耕亦係代友值班。是日。

上詢布穀戴勝。是二是一。公對布穀卽戴勝。

上稱善。因垂詢出身甚悉。此簡在之所由也。

上後語大臣朕曾於籍田中簡拔一人卽謂此云

劉文恪公事略

公諱權之字德輿號雲房湖南長沙人父暉潭字湘客雍正庚戌進士由主事遷郎中出知泗城府有政績兄校之乾隆辛巳進士授檢討晉中允改郎中典試浙江督學貴州皆稱職公舉乾隆二十五年進士選庶吉士習國書由編修晉中允洗馬母憂歸服除適四庫全書目錄提要成公嘗爲纂修官議敘補侍講轉右庶子五十年大考二等擢大理少卿晉本寺卿遷左副都御史五十二年大挑直省舉人公條陳積弊請派出王大臣於命下之日卽赴內閣住宿其各部院司員俱迴避不令持藥入閣畫諾並請派科道官二人稽查及令步軍統領衙門

會同五城御史一體巡察

上覽奏嘉納如所請行是年所選得人都人士翕然稱之公意蓋有所指也五十六年擢禮部侍郎嘉慶三年調吏部左侍郎四年

仁宗親政激揚彰瘴飭官常首擢公左都御史時湖南採買頗爲民累公續陳地方吏奉行不實往往藉端肥橐各情弊并請赴鄰邑採辦以免派累得旨通諭各督撫嗣後採補倉穀務飭所屬在豐稔鄰縣按時值採買不許向本地派買并將向來胥吏積弊嚴行查禁至社倉原係本地殷實之戶好義捐輸爲備荒之用近來官爲經理大半借端挪移日久并不歸款遇歉

歲顆粒全無。以致殷實不願捐輸。正人不願承辦。是向來良法。徒供官吏侵漁。亦應一律查禁。此後各省社倉。仍聽本地殷富。擇公正者自行辦理。不假官吏之手。以杜弊端而裕民食。四川舉人朱琬條陳軍務。前後數萬言。公悉爲代奏。尋以編修洪亮吉投遞書函。語多狂直。未卽呈進。有旨查詢。公自請嚴議。上以公人品端正。節次所陳奏事。皆切實。改爲降三秩畱任。未幾遷吏部尙書。賜紫禁城騎馬。舊例部院截取人員。祇歸單月銓選。公議增京陞一班。庶常散館。以知縣用者。五缺後用其一。公議令到班卽選。大挑舉人。除新科不計。仍截止近三科。不得與挑。公請合新科一并計算。皆著爲令。七年充軍機大臣。管



理戶部三庫事。賜居海淀。會三省敎匪戡定。

上以公素日陳奏多所建白。兩次命優敘。九年考績。詔以

公在軍機處。小心勤慎。復下所司。優敘。尋調兵部尙書。出勘河

南河工。差還。調禮部尙書。協辦大學士。加太子少保。尋因保奏

軍機章京。欲將中書袁煦列入。袁煦者。公房師紀公昀女壻也。

侍郎英和劾公瞻徇。有旨降編修。尋遷侍讀。晉侍讀學士。十

一年。遷光祿卿。命偕侍郎瑚素通阿。往勘通州剝船虧損數。

并嚴禁封雇民船之弊。旋命往眞定勘獄。還擢內閣學士。九

月。遷左都御史。十二年。遷兵部尙書。仍賜紫禁城騎馬。十五

年。協辦大學士。再充會典副總裁。七月。

上行秋獮禮。命偕儀親王永璇。尙書明亮。勒保等。畱京辦事十六年。

上幸五台。命仍司畱鑰。五月。拜體仁閣大學士。管理工部事務。充國史會典館正總裁。復太子少保。十七年。管理戶部三庫事。十八年。考績。

上以公襄贊綸扉。夙夜匪懈。命優敘。尋以日疾請假。賜御醫診視。許原官致仕。給半俸歸里。後猶蒙恩賜福字如意諸珍物。二十三年六月。有大星隕於湘東。照江水皆赤。越翼日。公薨。壽八十一。優詔悼憫。賜祭葬如例。諡文恪。公性精明。而出以厚。敝厯京秩五十餘年。以學行結主知。當官能舉其職。所

敷奏嘗不令人知。雖至親骨肉莫能述。而疊典文衡。實漢大臣  
中所罕覩。計分校順天鄉試三。校禮部試一。典江南鄉試二。貴  
州鄉試一。順天鄉試二。主禮部試一。督安徽山東江蘇學政各  
一。監臨順天鄉闈再讀。殿試卷四。闈大考翰詹卷二。門生故  
吏徧天下。而公鑑空衡平。未嘗有所私昵也。子若璫以廕授主  
事官。貴州直隸州。若珪由副榜官員外郎出。爲湖北知府。署漢  
黃德道。死。粵寇之難。

王文端公事略

國朝二百年來由大魁陟宰輔者凡數人順治丙戌則聊城傅公以漸丁亥則武進呂公宮己亥則崑山徐公元文乾隆丁巳則金壇于公敏中己未則番禺莊公有恭戊辰則會稽梁公國治辛巳則韓城王公杰也繼王而起者己亥則大庾戴公衢亨癸丑則吳縣潘公世恩而已數公相業皆可稱而王文端公風節爲尤著蓋公在相位實與和珅同列凡不附己者輒隲訕之公接以大體不爲悻悻壯煩之事而遇所當執汔不與和珅同卒能密贊廟謨明正其罪此其所以尤難也公立朝四十餘年凡五典會試考前明三主禮部試者王元美輒推爲盛事我

朝。范。文。肅。李。文。勤。陳。文。貞。朱。文。端。張。文。和。史。文。靖。皆。三。主。會。試。  
諸。城。劉。文。正。公。長。白。介。受。祉。宗。伯。則。四。主。會。試。其。五。主。會。試。者。  
自。熊。文。端。公。德。定。圃。宗。伯。外。得。公。而。三。然。則。公。之。敬。歷。遭。逢。疊。  
司。文。枋。可。謂。獨。際。其。盛。已。公。字。偉。人。號。惺。園。一。號。畏。堂。先。世。自。  
山。西。洪。洞。遷。陝。西。之。韓。城。生。而。端。凝。好。學。由。拔。貢。生。得。教。諭。未。  
任。遭。父。喪。服。終。貧。甚。爲。書。記。以。養。母。尹。文。端。陳。文。恭。爲。江。南。督。  
撫。時。皆。禮。公。入。幕。府。兩。公。皆。名。知。人。而。最。賢。公。謂。爲。正。士。乾。隆。  
庚。辰。舉。鄉。試。次。年。舉。會。試。先。是。

純。皇。帝。嘗。語。近。臣。本。朝。百。餘。年。來。陝。人。無。大。魁。者。至。是。公。應。殿。  
試。讀。卷。官。進。列。第。三。

上親拔爲第一人。時值西陲戡定，魁選適得西人，比引見風度，凝然。

上益喜，爲詩紀之。由修撰累遷侍讀右庶子、侍講學士、少詹事，入直南書房，充日講起居注官，旋晉內閣學士，歷工部、吏部、禮部侍郎，擢左都御史。

上詢及母夫人年歲，御書南陔承慶額賜之。癸卯，母憂歸，甲辰，卽家擢兵部尚書，趨赴行在謝恩。

高宗曰：「汝來甚好。」君臣久別，知汝應念我。然汝儒者，朕不欲奪汝情，歸終制可也。公感泣。時朱文正公扈蹕相遇於行帳，歎曰：

上待公不薄哉。乙巳服闋充經筵講官。軍機大臣。上書房總師傅。賜紫禁城騎馬。乾隆五十一年丁未春。拜東閣大學士。總理禮部事。賜居第花園各一所。戊申臺灣平。圖形紫光閣。上親爲製贊。明年平廓爾喀。再圖形閣中。

上製贊如初。庚戌加太子太保。甲寅冬。公壽七十。御賜額曰。

贊元錫嘏。賜聯曰。臚名芸館魁多士。耆福台階引大年。及珎珠冠服上珍爲之壽。丙辰以足疾辭退。兩書房。軍機禮部事。戊午仍值軍機。歷充四庫三通國史。實錄諸館總裁。公爲人廉靜質直。素行無瑕疵。在政府誠於奉職。

純皇帝知公深和珅。雖厭公卒莫能去也。如此者十數年及。

仁宗親政和珅以罪誅公意益得發矇矣然公當念大臣所當爲者非盡於所能言獨居意營邑邑深念而不怡將告歸復上疏其略曰竊惟

皇上親政以來恩威並濟內外臣工無不洗心滌慮共砥廉隅臣年齒既衰智識愈鈍更何有干慮之一得惟是積弊相沿有極重難返而又不可不亟加整飭者一各省虧空之弊起於乾隆四十年以後州縣有所營求卽有所餽送往往以缺分之繁簡分賄賂之等差此豈州縣私財直以國帑爲黃緣之具上官旣甘其餌明知之而不能問且受其挾制無可如何間有初任人員天良未泯小心畏咎不肯接收上官轉爲說合懦者



千方抑勒強者百計調停務使受代而後已一縣如此各縣皆然一省如此天下皆然於是大縣有虧空十餘萬者一遇奏銷橫征暴斂挪新掩舊小民困於追呼而莫之或恤靡然從風恬不爲怪名爲設法彌補而彌補無期清查之數一次多於一次寬繳之銀一限不如一限輾轉相蒙年復一年未知所底竊謂嘉慶四年以前之州縣此時或遷他處或經物故原難責之現任補償然從前州縣用度不節因而侵挪倉庫今

皇上整飭紀綱大吏皆以廉節相尚豈從前上司專講酬應州縣反覺寬舒今茲上司各矢清廉州縣轉形拮据耶乃州縣則任催罔應上官亦莫展一籌意或有苦樂不均未之調劑歟有

賢否不分。因以觀望。歟。固宜廣求整飭之法。以冀倉庫漸充。實也。一各省驛遞。設立驛丞。專司凡有差使。各按品級乘騎之外。加增不過二三騎。多則驛丞不能派之民間也。照常給廩之外。一無使費。使臣及家人等知驛丞之位卑俸薄。無可誅求也。迨後裁歸州縣百弊叢生。請先言其病民者。州縣管驛可以調派里民。於是使臣乘騎之數日增一日。有增至數十倍者。任意隨帶多人。無可查詢。由是管號長隨辦差書役乘閒需索。差使未到。火粟飛馳。需車數輛及十餘輛者。調至數十輛。百餘輛不等。羸馬亦然。小民舍其農務。自備口糧草料。先期守候。苦不堪言。又慮其告發也。則按畝均攤。甚而過往客商之車馬。羈留賣

放無怪小民之含怨也。至於州縣之耗帑。又有無可如何者。差使一過。自館舍鋪設。以及酒筵種種糜費。并有負緣餽送之事。隨從家人有所謂抄牌禮。過站禮。門包。管廚等項。名目甚繁。自數十金至數百金。多者更不可知。大抵視氣餒之大小。以爲應酬之隆殺。其他如本省上司。及鄰省大員。往來住宿。亦需供應。其家人藉勢飽慾。不厭不止。而辦差丁胥。浮開冒領。本官亦無可稽核。凡此費用。州縣之廉俸。斷不能支。一皆取之庫帑。而虧空之風。又以成矣。議者謂驛站裁歸州縣。當時係爲調劑郵政起見。每年一驛錢糧。自數百金至數千金。付之微員。既非慎重之道。且遇緊要差使。及護送兵差之類。額馬不足。必須借資民

力是以定議裁改。不知驛站未歸州縣以前，豈無緊要差使，豈無護送兵差之類？當其時必已另設臺站，或調撥營馬，或籌款購買，事竣各有報銷。與驛站兩無關礙。若州縣管驛，則平常供應亦有不可數計者。然則虧空之弊，大半因之。欲杜虧空，先清驛站，當亦轉移之要策也。况體恤民隱，尤爲急務乎？今軍務旣竣。

皇上勤求治理，似無大於此二者。但以積重之勢，不可不思至當之方。或改復舊章，或博稽眾說，斟酌盡善，斷自睿裁。從此倉庫盈而郵政肅，天下幸甚。疏入。

上嘉納焉。嘉慶四年，公以腹疾乞休，命公明安率太醫視之。

並賜內府人蔭九月復請告。溫旨慰留。許扶杖入朝。七年秋復請。詔予在籍食俸。加太子太傅。八年二月。陞辭。詔。州。

皇考御前陳設玉鳩杖一枝。加恩賞給。俾得敬承。遵澤朕賦詩二章。親書條幅。并書聯語。以寵其行。再加賜人蔭一斤。用資頤養。并頒饌品。賜餞令馳驛回籍。所過地方官。在二十里以內者。妥爲照料。以示朕優眷老成至意。賜詩有云。直道一身立。廊廟清風兩袖返。韓城足以概公生平矣。五月公抵里。奏謝。手勅報云。一路平安。實深欣慰。京師見望雨澤。未能霑足。川楚軍務。略有端緒。亦未全靖也。特諭卿知之。又賜香袋藥錠等。

物六月疏謝。手勅云卿在家頤養努力加餐益增康健京中自四月半得雨麥收不過五六分晚禾日見芄芄川楚軍情甚好大約五六月內可全靖矣嗣是公每有陳奏必奉手詔垂問八月奉勅云卿在家頤養想益康健中元日經略奏報邪匪全靖朕承

天恩

考佑實深欽感特諭卿知之二十日起程幸山莊見住兩閒易行宮遙望西秦彌增想念十月手勅云卿在家安善覽奏欣慰今賜卿神糕並如意願永茂遐齡長延福壽十二月賜勅云嚴寒沍凍諸惟珍攝用迓春祺益綿福履九年正月奉手

詔云。新春介祉。福履益綿。遐望闕雲。曷深記念。親書福字并荷包等物。附使帶去。賜卿以返鴻禧。是月十日。公及程夫人壽皆八十。御書福綵燕喜額。并壽佛如意等珍物。命巡撫方維甸於其生日。賫至家。賜之。賜詩有云。兩朝調鼎文思被。入秩齊眉壽域宏。十二月。公入都叩謝。詔許乘肩輿至隆宗門外。扶杖入內朝。召見後。屢有食物之賜。並疊前韻。賜之。十年正月初十日。薨於京邸。優詔悼閔。贈太子太師。入祀賢良祠。賞陀羅經被。派榮郡王綿億。帶侍衛十員。往奠茶酒。並賞內庫銀二千兩治喪。賜祭葬如例。諡文端。公既歷典乾隆乙未戊戌丁未己酉庚戌。禮部試。又嘗爲湖南江南

江順天考試官一督福建學政三督浙江學政一典武會試所  
進多佳士其於門下士相待甚篤然未嘗少涉私引教以必爲  
君子而已嘗訓及門云爲政之道當開誠布公不可有意除弊  
此弊除他弊興矣性寬厚然於世之以姑息爲寬大者極不然  
之曰縱惡以取名如國家何少從武功孫酉峰游聞關閩正  
學及見陳文恭聞性命躬行之說益自信生平於浮屠老子法  
未嘗言及亦不加排斥有語及者輒不對曰吾未嘗習此也所  
著有葆醕閣集惺園易說行於世



孫文靖公事略

公諱士毅字智治別號補山浙江仁和人。生而穎異讀書目數行下初贈公以家貧欲俟其長卽服賈學使勞青岳先生見而異之乃使習舉業將應童子試期迫公晝則誦習夜屬文漏三下思卧則起行庭中往還數四復搆思既而倦極沈沈睡矣夢中驚覺蹶然起以頭觸壁令極痛神氣大爽如此者屢日遂澈夜不倦藝大進補弟子員讀益勤蓋公一生自樞垣保直以及宣力邊疆听夕未敢憚勞皆少年磨厲所致也乾隆己卯舉於鄉年已四十辛巳成進士歸候選班其明年

上南巡召試第一授內閣中書入直軍機處陞侍讀雲南

匪不靖大學士傅文忠公督師令主章奏師還遷戶部郎中庚寅典湖南鄉試督學貴州擢大理少卿授廣西布政使調雲南就遷巡撫總督李侍堯以贓敗坐不先舉劾落職發軍臺簿錄其家不答一錢

上轉嘉其廉頒行命纂校四庫書授編修書成超擢太常少卿復出爲山東布政使時巡撫國泰以貪賂代之者爲明興公遇事多所匡正明公出巡公慮其儻從索擾委丞倅官與偕行有婪索者卽稟聞明公亦聽之會有旨查虧帑實數明公數月未奏公以爲不可明卽令代查疏疏入

上曰國泰等罪不可道矣立賜自盡公尋遷廣西巡撫調廣

東粵民多獷悍。正供銀米。州縣不能征。及奏銷。往往墊解。黠者遂延抗不繳。公詳核。彙爲冊。賦法以清。焚塘盜藪也。屢治不悛。復糾眾拒捕。傷官。公率兵張旗鼓。環其窰而圍之。命縛獻渠魁。否則遷其民。楮其地。遂獲盜首七人。寘諸法。總督富勒渾縱僕婪索。公以實奏。卽命公讞獄成。

上嘉其持正。授兩廣總督。臺灣林爽文反。公以閩粵海道相接。而潮州最近。嚴兵爲之備。未幾。王師渡海。果調粵兵且徵餉。皆叱嗟辦。

上大悅。晉太子太保。賞戴雙眼花翎。一等輕車都尉。會安南國王黎維祁爲其臣阮惠所逐。其母妻幼子。敏關額救。

上命公往。公時在潮。先馳赴龍州。奏至而。旨方下。公遂自請出關。並調知維。邠在其國良才縣境。亦招聚義兵。圖恢復。飛驛以聞。詔公由廣西直抵黎城。別命雲南提督烏大經由蒙自進。阮惠遣將拒於壽昌江。又分兵屯嘉觀。公至壽昌。擊破之。進兵至市球江。賊守禦甚固。會日暮。我兵隔岸與相持。陽於下游。造浮橋。作欲渡狀。以綴賊。密遣總兵張朝龍於上游暗渡。繞出賊後。賊大亂。公卽勒兵乘筏鼓勇前殲其眾。其屯嘉觀者游擊張純走之。而副將慶成設伏要害。亦擒僞指揮黎廷等。天已明。乘勝至富良江。賊大驚曰。江在國門外。無江是無安南也。遂盡收戰艦泊南岸。悉眾拒守。公察賊陣弗整。急覓船筏載兵百。

餘先勦江心賊。奪其大船一。賊稍退。少閒復來。凡五六戰。斬獲甚多。賊膽落。公因昏黑中。賊不知我兵多少。遂以所有船筏盡載兵。令提督許世亨等於次日五鼓直衝彼岸。賊不知所爲。我軍分路追奔。賊死者不可勝計。有十餘船順風而逸。張純追及之。賊反拒我兵。圍其船焚而沈。諸江無脫者。獲其偽印三。遂克黎城。黎氏宗族及百姓等俱伏迎道左。阮惠遁歸富春。是役也。賊眾四萬守江。我兵先至者僅千人。公親統大軍入其國所向披靡。烏大經之師但遙作聲援而已。乃傳旨復維那封並馳報廣西巡撫孫永清送其家屬歸事聞。

上封公一等謀勇公。賜寶石頂下。詔班師。公亦藐視小醜。

遵旨凱撤而黎維祁本房主也。孤立無助。阮惠乘閒率餘黨傾國而來。倉猝閒眾寡不敵。維祁聞惠至。輒攜家屬遁國內。無主。民皆竄。賊勢復聚。公欲以死報國。策馬直犯其鋒。千總薛忠挽公馬泣曰。損大臣有傷國體。公怒。擊以鞭。碎其兩耳。而馬首已被牽回。不能再進矣。乃先率兵渡市球江。奪據北岸。以待後隊之至。總兵李化龍行至浮橋。失足溺水。橋隨斷。世亨等沒焉。公遂入關。維祁與其母子俱至。安置南甯。時乾隆五十四年正月三日也。公上疏自劾。辭公爵。繳還恩賞。

上以撤兵太早。引爲己過。釋公罪。允所辭公爵。以福康安代之。命公仍駐鎮南關。調度阮惠知得罪。天朝悔懼。求內附。公嚴

斥之既察其誠且以黎氏督亂不堪立國遂與福公偕奏安南不必用兵狀

上從其議尋授公兵部尙書充軍機大臣入直南書房 賜第一區 賞紫禁城騎馬典順天鄉試是冬授四川總督蜀中多盜鑄百物騰踊公請發價收繳以杜其弊

上聽之下其法於他省未幾江南書吏冒征事發總督書麟獲罪調兩江總督公至民遮訴多涉官吏爲別其重輕躬親研鞠無枉縱徐州王平莊漫口未合馳抵毛城鋪督工蕭碭山靈壁宿州及睢甯之十三社皆被水力營疏洩及撫卹事宜胥稱旨授吏部尙書協辦大學士西藏巴勒布以貿易構釁奪據攝

拉木地川督鄂輝討之。公往攝其任。籌軍捐駐打箭爐。嗣以牛  
病轉運多遲。親赴察木多途險峻。臥載甚艱。復至前藏。藏地跣  
步皆山。有瓦合丹達拉利諸名。其中七十二峰最高者。上下三  
百里。盛夏雪湧如潮。自峰頂順流下。卽成冰淋。滑不受趾。公乃  
募土人立其巔。以繩繫腰。縋而上。稍適處則步行。然兩旁雪深  
無底。一失足卽杳不復見。拉利山下有海子。徑十里。夏涉水。春  
秋冬則踏冰而渡。寒裂肌骨。爲運道所必經。公每遇險要。必身  
先士卒。人人感奮。芻茭糗糧得無誤。壬子八月。廓爾喀平。詔  
圖二十功臣像於紫光閣。公與焉。御筆親製贊。旋拜文淵閣  
大學士。偕福康安和琳駐藏。謀善後。凡所經畫。可永守。公年且



七十矣。事未竣而湖南苗反。延及蜀之秀山。公馳遏其衝。頃之賊爲大軍所蹙。潛來窺。公發兵縱擊。斬首二百餘級。擒賊目二。自後無敢入川境者。嘉慶元年。湖北秀民創白蓮教。擾至酉陽州。公營於苗容。屢勦賊。賊屯小坳。公由閒道進攻。出不意。冒雨登山。先分兵奪其坐仙坪。賊驚竄。無何。喊聲四起。我兵不及賊十之一。公令參將何元卿固守山梁。獨率二十人回營調防。守兵六百。率都司馬瑞圖等往斬賊。數百元卿見賊陣忽動。知公至。大呼馳下。賊前後受敵。遂不支。元卿愈奮厲殺賊。直至小坳。與公合聲勢。益壯。焚其巢。俘獲無算。以功封三等男。公念賊巢林立。惟茶園溪最多。宜分道進剿。時大雨旬日。火藥不然。俟其

奔恐賊得預爲備。乃寅夜分軍爲四人。持短兵。至浦入呼聲震山谷。賊俱竄聚茶園溪。千總張超執長矛先登。斬其魁。我兵勇氣百倍。賊敗績。追逐四十餘里。積屍遍野。餘渡河遁。後濟者多溺斃。賊旣被大創。退據紅巖堡。之旗鼓舉。公移營而前。六月。薨於軍中。年七十有七。

上聞震悼。復還公爵。命內臣護其喪歸。賜金。賜祭葬。

予諡文靖。飾終之典。有加禮。長孫均襲伯爵。入漢軍旗籍。成公志也。公性孝友。事兩兄如父。早歲與杭堇浦吳西林諸老輩相砥礪。故詩文能獨出機杼。生平精力過人。每日辨色起。至中夜。文檄填委。應之綽綽。若無事。猶作酬答書。或數千言。未嘗起草。

兩江總督官尊向不甚理事。公一反所爲。所到撤前站。謝供億。不拘嚴鼓之節。白事者應時。卽見尤刻意憐才。一介之士輒與均禮。故事軍機大臣例不見客。不答拜。獨公與故舊周旋宴飲。如平生歡家。本寒素。能耐艱險。凡繩行沙度之地。人騎瑟縮。而公視若康衢。然亦有天幸。出意外者。從忠勇公征緬時。虜氛甚惡。公自防一利刃。朝夕摩挲。天雨糧斷。公韞中藏筍脯五。以其三奉忠勇公。而畱二以自給。餓三日而糧始通過。天生橋馬駭墜。山澗中澗深數十丈。最絕良久。馬忽蹶起。負公掀淖以出。曲折數十里。竟達大軍。性愛石。有米顛之癖。督學黔中時。得文石百有一枚。因自署曰百一山房。所著奏議若干卷。百一山房文。

集若干卷藏於家。

董文恭公事略

公姓董氏諱誥字蔗林浙江富陽人父文恪公諱邦達雍正  
一年進士選庶吉士授編修充日講起居注官累遷中允侍講  
侍讀學士乾隆十二年命直南書房擢內閣學士母憂歸明  
年秋命照前尚書梁詩正之例來京在內廷行走俟服闋時  
遇缺補用十五年補原官遷禮部右侍郎調工部旋調吏部充  
經筵講官二十七年晉左都御史再晉工部尚書二十九年調  
禮部尚書賜紫禁城騎馬典陝西江西鄉試各一充會試副  
考官一武會試正考官二三十四年以年逾七十乞休 溫旨  
慰留七月薨於位 賜祭葬 予諡文恪公登乾隆二十八年

國朝先正事略卷二十

三

進士與館選授編修。命人懋勤殿寫金字經爲

孝聖憲皇后祝嘏。三十四年遷右中允。丁父憂服闋。命直南

書房。轉左中允。先是文恪公工繪事。御製詩題詠甚多。及是

公繼武南齋。簪筆之暇。閒涉藝事。其精

上深賞焉。尋以侍讀充日講起居注官。以侍讀學士充經筵講

官。三十九年典江南鄉試。選內閣學士。明年擢工部右侍郎兼

管錢法堂事務。尋調戶部。充四庫館總裁。命輯滿洲源流考

充武英殿總裁。四十四年。命爲軍機大臣。賜第西直門外

黃紫禁城騎馬。四十九年甘肅石峰堡逆回平。

上以公勤勞懋著。命優敘。五十一年擢戶部尚書。明年臺灣

逆匪林爽文就擒。命與二十功臣之列圖形紫光閣。

高宗皇帝親爲製贊。五十五年加太子太保。明年詔刊石經於太學。充副總裁。又明年廟爾喀平。命與十五功臣之列再圖形紫光閣。

上復親爲之贊。五十五年拜東閣大學士。總理禮部。仍兼戶部事。二年丁生母憂。特旨賞陀羅經被。遣御前侍衛豐仲殷德帶領侍衛十員奠茶酒。並賜祭葬。三年三月葬母畢。詣闕謝恩。諭暫署刑部尙書事。以方辦理秋審。一時未得其人也。四年正月。

太上皇晏駕。

仁宗皇帝命恭理喪儀。仍充軍機大臣總裁。實錄晉太子太保。五月服闋。授文華殿大學士。仍兼刑部尙書。國史館總裁。九月奉安。

裕陵禮成。命恭點。

高宗純皇帝神主。加太子太傅。賞黑狐端罩。七年。三省教匪平。

上以公自用兵以來。票擬愼勤。特予騎都尉世職。子淇由任子。當爲員外郎。詔以郎中用。九年。典順天鄉試。尋管戶部三庫事。十二月。

高宗實錄成。詔董誥在館八年。始終其事。宜加優獎。其父董。



邦達。從前未祀賢良祠。可令入祀。十三年典會試。賞密雲縣房屋一所。十四年。晉太子太師。三月。公七十生辰。賜御書額。曰贊樞錫慶。他珍物稱是。復賜御製七言詩有兩朝知遇。一身肩之句。十五年。充上書房總師傅。十六年。再典會試。明年。加太保。十八年。九月。逆匪林清等就誅。

上以公晝夜宣勞。命加三級。及滑縣平。有詔優敘。公次子員外郎醅。特旨以郎中用。二十年冬。因病請致政。溫旨慰留。并以軍機處事繁。命改管兵部。無庸兼管刑部事。二十一年。再典順天鄉試。二十二年春。命偕莊親王綿課等。畱京辦事。六月。復命管理刑部。七月。命管理行在刑部事務。兼佩吏

部印鑄二十三年二月再疏乞休。優詔俞允。十月病瘳篤。

特派御前侍衛載銓帶御醫往視。是月薨。詔曰。予告大學士

董誥。自其父董邦達供職內廷。渥承

皇考知遇。洊擢尙書。嗣董誥通籍詞垣。荷

皇考眷注。允隆入直南書房。供職書畫。最勤且久。洊躋卿貳。用

爲軍機大臣。兩經繪像。賜贊褒嘉。朕御極後。晉擢綸扉。宣力垂

四十年。奉職恪勤。且聞邸寓清貧。原籍並無田宅。益徵其持躬

端謹。遽聞溘逝。悼惜殊深。已賞陀羅經被。可晉贈太尉。入祀賢

良祠。派定親王綿恩率侍衛十員。卽日前往奠醊。十六日朕親

臨賜奠。賞內庫銀二千兩治喪。其次子董醵服闋後。以四品京

堂卽補。御製詩輓之。並傳諭其家刻詩墓次。尋賜祭葬。  
謚文恭。公自擢閣學。後受特達之知。閣殿試朝考。並御試。  
翰詹及考試。試差諸卷。凡校文之役。無弗與遇。巡幸秋獮。諸  
大典罔不扈從。每三載考績。輒獎敘有加。嘉慶七年。教匪平  
定。

上明詔中外曰。董誥經

皇考簡任多年。克盡忠愍。知無不言。言無不盡。蓋衰其實也。其  
尤難者。則在和珅用事時。張威福排擠異己。公與王文端諸公  
摺拄其間。遇事多所救正。每獨居深念。處若忘行。若遺在堂。則  
循階在室。則繞柱。其用意深隱。不可驟識。卒能仰贊。

所謨殲除大慙雖語秘外莫能知而公之識力深遠抑可得其  
大凡已公嗜學工詩古文好成就才儁當官能舉其職出入禁  
闕數十年進止皆有常度所進呈諸畫本

兩朝聖人並有題詠收入石渠寶笈三編然特公之餘技云

王文儋公事略 子宗誠

王公懿修字仲美安徽青陽人乾隆三十一年進士選庶吉士授編修入直南書房三十六年充陝西副考官明年分校會試三十九年典廣東鄉試提督廣西學政四十四年分校順天鄉試明年典試江西遷司業擢侍講轉侍讀晉侍講學士充日講起居注官四十八年再典廣東鄉試尋督湖北學政五十三年遷少詹事乞病歸旋丁內外艱嘉慶元年正月

太上皇帝舉行千叟宴公與焉賜御製詩刻及玉鳩杖文綺等物七年補通政司副使遷光祿卿晉內閣學士明年補禮部侍郎提督順天學政十年擢左都御史晉禮部尚書管戶部三

庫事。命紫禁城騎馬充經筵講官。十二年充上書房總師傅。上以公部務殷繁不能逐日入直。命以部務餘暇入內廷。不必拘定日期。惟畱心查察功課。如有怠惰曠誤者。卽據實劾奏。十三年以病乞休。溫詔慰畱。十四年恭遇五旬萬壽慶典。加太子少保。典會試。兩充殿試讀卷官。當是時公子宗誠已官學士。嘗隨公扈蹕東巡。

睿皇帝賜翰林宴。公父子同席。

高宗實錄成。宗誠以纂修官賜宴禮部。公適以尙書主席。宗誠又繼直上書房。奎章珍器賞賚稠疊。父子同朝。極優渥之遇。蓋近今所無。雖

睿皇帝亦以公兩世膺知遇廉謹自將時發天音而垂清問也十八年公致仕又二年壽八十特賚如意文綺諸珍物命侍郎成格齎往公詣宮門謝適

上出御經筵解御佩荷囊賜之二十一年薨優旨卹惜

命慶郡王永璘往奠卹照尙書例議卹賜祭葬如禮予諡文僖公性樂易與人交無少長貴賤咸得其懽款語移日見者忘其爲達官好汲引後進孜孜若不及多所成就應制諸作典雅純正詞林中事有資討論者率以屬公焉

宗誠字中孚又字廉甫乾隆五十五年一甲三名進士賜及第授編修上書房行走歷官禮部工部侍郎工部尙書終兵部

尚書經筵講官

賜紫禁城騎馬。當乾嘉時。嘗爲雲南四川陝

甘鄉試主考官。會試同考官。文武會試總裁。道光時。屢充閱卷。大臣門下士。旣多顯貴矣。又以貴公子早取甲第。與文僖公同直。禁廷海內推榮遇。而公謙退自牧。接同官後進。皆自居敵。以下姻友見者。多避去。不能敵其謙。任學政。禮賢愛士。然遇弊必發。不稍受私謁。歷官皆能舉其職。道光八年。回疆戡定。

宣宗皇帝御午門。受俘。兵部尚書以組縛逆酋張格爾跪闕下。宣旨畢。引交刑部。尚書押赴西市誅之。故事。凡內地勦賊不獻俘。惟外夷獻俘。故惟康熙雍正乾隆間舉行。而嘉慶朝無之。至是萬眾爭覩。歡歎。訖爲盛事。而宗誠實長兵部。禮成以軍功。



受。賞。公。供。職。益。久。不。懈。任。大。司。馬。凡。十。有。六。年。以。道。光。十。七。  
年。薨。於。位。年。七。十。有。四。賜。祭。葬。如。典。例。生。平。篤。內。行。和。而。有。  
執。守。居。京。師。宅。當。冠。蓋。衝。軒。居。皆。過。不。留。其。嚴。峻。不。苟。若。是。而。  
不。有。其。名。故。人。皆。習。其。和。而。忘。其。介。公。之。薨。也。詔。稱。其。清。勤。  
端。慎。清。慎。勤。人。所。知。也。若。公。之。端。則。惟。  
聖。主。知。之。矣。子。元。榜。官。兵。部。郎。中。